



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima



tir yimiyim

TAPAK 3



Wagner-i züngsem tasen manisemtsü: Prigozhin

Modi sorkari Manipur tensa azioktsü memetet: Kcharge

VOL. XX NO. 289 (ADOK 289)

DIMAPUR SANGTENNÜ (TUESDAY)

LUROI (AUGUST) 01, 2023

₹ 5.00

Ao Senden aser AKM-i Tsüngremmung salem lemsateper

Mkg. July 31 (TYO) : Ao Senden aser Ao Kaketshir Mungdang na pronglai sangdong balala nung Aotsür Aor ajak den Tsüngremmung benjong tepela salem lemsatepba osang metetdaksüogo.

"Iba Tsüngremmung mongpu mapang, asen kin sobaliba senmang tajung koba asen tsürabur mapang nungi beshia arudagi, item meraktem wazüka yua iba Tsüngremmung benjong shisangdaksüdi," ta Ao sendeni metetdaksü.

Ano talisa asen kin lanurtem rongnungi UPSC tatidang tashi nung takok tajung ngua menden

tajung ajangzükta atema asen teyanglur Tsüngrem tenüng sanga iba Tsüngremmung mongdi ta Ao Senden-isa ayongzükogo.

AKM-ia Tsüngremmung tepela salem lemsatepba sangdong ka nung, " Akhi tsürabur mapang nungi pei züsenba tsünusenpongtsü ajak nung tsüksüngonsünga temoatsü lidakjang ta temoatsü meshizüka benjongmung munga aruba ama, tanüa asenoki Tsüngremer temoatsü meshizüka iba benjongmung metsüngareta mungdi arung," ta ayongzükogo.

SC-i Centre dang Manipur video atema ashishir

New Delhi, July 31, 2023 (Agencies): Manipur nung tetsür ana yimjak nung mangsa anir senzüba video atema Hombarnü Supreme Court-i Centre den ashishitep aser FIR benoktsü menuba asüngdang.

Chief Justice of India (CJI) DY Chadrachud-i anir judge asem indang bench-i Centre dang kechiba police-i zero FIR benoktsü atema anogo 14 agi ta asüngdangogo.

"Nenoki takoksa anur nem legal teyari kechi agütsür onok dang shiang" ta SC bench-isa metetdaksü.

Iba lendong ya May 4 nü atalok saka May 18 tashi nung FIR mebenok liasü.

Northeast state nung atalokbaji linük nung tangalena ataloker ta shia temeten mebushitsüla ta parnokisa ashi.

Manipur tsür ana dak atalokba ya kanga dang taoktsatsü aketba mapa ka lir aser iba ken o

ya state police nem mebeshidaksünür, ta SC bench-isa ashi.

Supreme Court-isa Manipur sorkar dang iba tatalokba atema kechi mapa inyaker aser tarutsü nung ibala lendong mataloktsü atema kechi sentong atongdar ta asüngdangogo.

Supreme Court nung iba ken o ya Mongulbarnü maneni angadangtsü.

Iba tatalokba dak sendakba nung Manipur police-i tang tashi nung nisung 7 pua lir.

July 27 nü Centre-i Supreme Court dang tetsür ana indang ken o ya CBI nem bushisüngdang asütsü agütsüogo aser sorkari tetsürtem anema tashiyim mapa inyakba metoktsütsü ta shiogo.

Ministry of Home Affairs (MHA)-ia Secretary Ajay Kumar Bhalla ajanga Supreme Court dang iba ken o ya Manipur nung mesüi tangalen angadangtsü atema temelaba meshiogo.

Police-i tanur dak tashiyim inyaksang puogo

Kohima, July 31, 2023 (TYO): July 9, 2023 nü Kohima kübok Tsiesema yimtsüng nung tanur tetsür ka dak tashiyim agi shi nung medemba sülen jenshia aruba nisung ka Kohima Police-i puogo.

Iba nisung ya Vilie ta jangjaogo aser police-i pa aputsü bushitepa aruba sülen July 29, 2023 nü Tsiesema yimtsüng

nungsa pa apu.

Tsiesema yimtsüng tezülen pai arishi küm 5 tanur ka dak tashiyim agi shi nung medem aser tanutsülar kibongi Women Police Station Kohima nung FIR ka benoka liasü.

Arishi küm 20 tain Avilie Mere ya Tsiesema Basa nunger lir aser pai iba mapa inyakba nangzükogo.

Chakhesang tetsütemi Manipur atema sarasademtsü

Dimapur, July 31, 2023 (Agencies): Hombarnü Chakhesang Mothers Association (CMA)-i Pftusero nung Manipur atema sarasadem sentong ka ayonga agiogo.

Iba sentong nung tetsür noklang aikati shilem agi aser parnoki Manipur nung tetsür ana yimjak nung mangsa anir senzüba aser tashiyim inyakba aitsü.

"Nisung ajaki iba inyakyim khukhua aitsütsüla" ta

Chakhesang Mothers Association general secretary Kezevinuo Krome-i ashi.

July 29 nü Chakhroma Public Organisation (CPO)-ia Chakhroma telongtet nung aliba Kuki yimtsüngtem nungi lennirtem den senden ka menogo.

Chümoukedima nung amenba senden nung Manipur nung rara anentsü aser Kuki o Meitei nunger tsüngda tangatetep kati arutsü atema CPO-i lemsatep.

Politics den tesentaktep malirtem Manipur-i yoktsü: CJI

New Delhi, July 31, 2023

(Agencies): Manipur tensa asadangtsü atema politics tsütsü tesentaktep maliba ketdangtsür telok ka yoktsü ta Supreme Court-i metetdaksüogo.

Manipur indang video atema ken o angadanga mapang Chief Justice of India (CJI) DY Chandrachud-i iba osang metetdaksü.

Supreme Court-i shimteta ketdangtsürtem rongnung tetsür aser tebur judges aser domain

experts adentsü imlar.

"Iba ya Nirbhaya ama tensa masü. Manipur nung tasa atonger tashiyim mapa inyaker aser iba ya IPC nung aibelen balaka ta lateta lir" ta CJI Chandrachud-i ashi.

"Ketdangtsübaren nung tamang kadaktsütsü atema Supreme Court-i shimteta teloki mapa inyaksü. Iba telok nung politics den tesentaktep alir shinga madentsü" ta paisa ashi.

Centre-i Manipur nung tetsür

ana indang video ken o ya CBI nem bushisüngdang sädaktsütsü ashiba atema CJI Chandrachud-i "CBI, SIT nem iba ken o odang agütsüba agi mepirir" ta ashi.

"Asenoki lar kishizüng tashi temeten agütsütsüla. Asenok mapang kanga endokogo, ita asem süiogo" ta paisa ashi.

"Sorkari kechi koma inyaka lir onoki reprangdangtsü aser idakji temulung süra Supreme Court-i teka maitsü" ta DY Chandrachud-isa ashi.

Nagaland nung anogo pezü shia nisung ka samar

Dimapur, July 31, 2023

(Agencies): Nagaland nung anogo pezü shia nisung ka samar ta Wokha Additional SP K Soriso-i ashi.

Government Higher Secondary School Wokha auditorium nung Deobarnü World Day Against Trafficking in Persons amongdang Soriso-i iba osang metetdaksü.

Tesüiba küm asem tsüngda nisung samaba ken o 87 benokba nung 83% ji arishi küm 18 teküpokpurtem liasü ta pai ashi.

Dimapur nunga iba anogomong amongdang "Nagaland ya India nung nisung

shibelenba tongti tesem ka ta ajitetogo" ta District Protection Unit Dimapur legal-cum-probationary officer Moajungla-i ashi.

Rongsen tsütsü meputep tulu aliba aser mapa inyaksü maongka manguba ajanga Northeast region nung nisung shibelenba maparen kanga bulua inyakteper, ta laisa ashi.

"Nagaland nung nisung samaba FIR 13% tashi nisung shibelenba dak sendaka lir. 2015 nungi 2021 tashi nisung 28 kümzükogo aser iba nung tetsür 26 dena liasü" ta Moajungla-isa ashi.

Nisung shibelenertemi onsite recruitment aser social media amshia nisungtem mesür. Parnoki hotels, parlours aser spas amala nung itasen tajung agütsütsü ta shia nisungtem mesüzüka anir aoer. Parnok alizüng atongba sülen websites aser accounts ajak agiener, ta laisa metetdaksü.

Yimtsüngtem nungi jila aser yimti nung linüba, mapa tajung inyaknüba, sensaktia, shisaliok shitak manguba, drugs achiba, kidang nungi jena aoba aser talidak maliba tanurtem shibelenba sang nung apur, ta laisa ashi.

Assam police-i Rashtriya Bajrang Dal anema FIR benokogo



Guwahati, July 31, 2023

(Agencies): Rashtriya Bajrang Dal-i Assam nung training camp ka ayongzüka agidang lanurtem nem arms training agütsüba sülen Assam police-i iba anema FIR ka benokogo.

Mangaldoi nung school ka nung Bajrang Dal züngsemtemi arms training agiba indang video ka prokshiba sülen Darrang Police dang iba anema FIR benoktsü tetuyuba agütsü.

"Mangaldai video dak ajemdaker Darrang Police SP dang ozüng tim kübok ken o benoktsü metetdaksüogo" ta Assam DGP GP Singh-i ashi.

July 24 aser 30, 2023 tsüngda

Darrang District kübok Mornoi yimtsüng nung Assam nunger lanur 350 shi kati arms training agia liasü.

Iba sentong nung lanurtemi martial arts, weapons, survival skills, quick thinking, politics aser Vedic rituals angazüka laisü. Parnokisa ideological orientation aser hand-to-hand combat angazük. Lanurtem ya arishi küm 18 nungi 30 tsüngda alirtem lir.

Praveen Togadia-ia aniba Rashtriya Bajrang Dal ajanga Assam nung lanur 50,000 aniokba osang metetdaksüogo.

Külen, opposition Congress aser CPI(M) teloktemi Hombarnü Bajrang Dal-i arms

training camp agiba bushisüngdangtsü takhangba agütsüogo.

"Iba sentong ayongertem merenshitsu la aser district administration-i sentong agitsü temelaba agütsüba inda bushisüngdang asütsüla" ta Congress Legislature Party leader Debabrata Saikia-i Chief Minister Himanta Biswa Sarma dangi shidi ka zülüogoi.

"Iba sentong ayongertem aser sorkar ketdangtsürtem merenshitsu la kechiyong parnoki kin, tamangba yimsü aser oshiben balala jembirtem tsüngda telemsa adokdaksütsü atema iba sentong agi" ta Saikia-i ashi.

NSUDD lokti senden den Election agi



Dimapur, July 31, 2023 (TYO): July 29, 2023 nü Naga Students' Union Dehradun lokti senden aser election agiogo. Iba senden nung züngsemtem külemi ajuruteper telok tarutsü asoshi tebilembatem lemsatep. Iba mapang tesüiba nung inyakbatem, tanü tayongzükbatem aser tarutsü asoshi alizüngtem lemsatepa liasü.

Lokti senden agiba sülen tsünglanglen agüja aliba ketdangpur tasentem shim.

1. President - Mr. Bopeto K Shohe
2. Vice President - Mr. Kito Murru
3. General Secretary - Mr. Temjensangba Kichu
4. Asst. General Secretary - Mr. Azerite Khutso
5. Finance Secretary - Ms. Lizonbeni Murry

6. Women Coordinator - Ms. Vokhoculu Chuzo
7. Games & Sports Secretary - Mr. Khyolamo B Kikon
8. Asst. Games & Sports Secretary - Mr. Viwesie Poji
9. Social & Cultural Secretary - Mr. Hetoki T Tuccu
10. Information & Publicity Secretary - Mr. Lungkhatthuibo Zeliang

Dengue tashidak nungi jenbua alitsü metetdaksür

Dimapur, July 31, 2023 (TYO): Health and Family Welfare department kübok Vector Borne Disease Control Program-i July 2023 ita piyong Anti-dengue month mongogo. Nübertem dang Dengue shirang metetdaksütsü, azüoktsü aser noktangtsü osang sangoktsütsü atema iba sentong ya colony aser yimtsüng kar nung awareness campaign agiogo. Wara agi kanga adokba Dimapur district den Mon, Mokochung, Kohima o Wokha amala wara kanga bulua madokba district tem nung alirtem dang Dengue tashidak indang kanga junga metetdaksüogo ta State Program Officer (NVBDPC) Dr. Neisakho Kere-i sangdong ka nung ashi. Tzüngluruwa mapang Dengue aser tanga vector borne diseases adoker ta

nübertem dang sangoktsü. Iba dak alia vector borne staff temi ita piyong public kümzüka ayutsü atema mapa inyaka aruogo aser maneni inyaktüsü, ta Dr. Kere-i ashi. Tawa Dimapur nung Dengue tashidak kanga puteter aser iba ya tzü tamajung atsüngtenba ajanga lir. Item nung merla kanga pokteter aser talisa Dengue virus belenshiba Aedes merla kanga apoker, ta paisa metetdaksü. Dimapur nung Urban Vector Borne Disease Scheme (UVBDS) staff temi colony 100 nung mapa inyaka arudar ajisüaka merla ano majem lir. Kiyong aika nung aser talisa Nagarjan colony nung merla kanga lir aser mapang shia Dengue tashidak puteter, ta Dr. Kere-isa ashi. UVBDS aser DVBO Dimapur ajanga Aedes merla

den tanga merla samatsütsü atema fogging asür. Ajisüaka Dengue ya khen nung mazüokteter kechiyong virus ya entsü dangi belener aser Aedes merla techanui metepba ajanga nisung dak Dengue menadaksür. Anungji colony/yimtsüng shia nung tzü atsüngdenba oset ajak agientsüla aser syntax, cement tank, drums, bucket amala nembanga ayutsüla, ta paisa metetdaksü. Dengue tashidak putettsü atema test kits balala lir. Nija mozü ki aikati Rapid Diagnosis Test kit (RDT) amshir saka Government of India NCVBDC program guidelines nung RDT ajanga Dengue putetbaji Probable Dengue ama züngshitsü aser sample ji District Hospital Dimapur mesüra NHAK dangi ELISA test atema yoktsüla, ta Dr. Kere-isa metetdaksü.

Ungma nung Sobaliba Saya Sentong ka agi



Ungma, July 31(TYO): Ungma yimtak Yimtsüngta Arok Sapang nung Longtrok Senden Ungma-i ayongzüka Sobaliba Saya Sentong ka Project Officer DRDA Mokochung Wt. Imyapangla Jamir tongti tesemdangher süa jaoka kaogo. Iba sentong nung tongti tesemdangher Wt. Imyapanglai jembidang Aor sobaliba tajungji asen tsüraburtemi rizünga yutsüba ajanga asenoki iba temoatsüji agir, anungji asenoki asen sobalibaji metsünga reta benshitsülata ashi. Sobaliba ya kechisarena ajak asoshi apu lateptsür ka lir,aji

asünung tanu kanga dang kara- a ainba putu nung alima asen tekapu nung amtaker reprangba mapang ka nung asenoki asen sobaliba kanga junga meteta alitsü nungtakerta Imyapanglaisa ayongzüka ashi. Longtrok Senden Ungma-i küm 38 tashi iba ama sobaliba sentong tajung ayongba ajanga nübur aika sobaliba meteta anitettsüogo,Longtrok Senden Ungma züngsem rongnungi Sademmeren aser Senlitulu tenati Guru khonang ngutetbaji takok tulu lirta Imyapanglaisa Longtrok Senden Ungma telok tenung sanga ashi.

Lokti kati benshia wazüka ayuba ajanga limapenzürtem(tourist) pua-er aser tourist aruba ajanga asenoki temoatsü jenti agitsü lenmang lapokerta laisa adenshia aliba benjungmunger ayongzüok. Kasa sentong nung Ungma yimtak aliba sobaliba tentet balala nungi kongshir ken,Kongshir yar tsüngsang,Masem ken,Amen ken,Antipong rara,Metsüng Araba,Tsük Asenba aser Sangpang Atuba nungertem shilem agia iba sentong kanga dang acha ket keta longso longsoa agia liasü.

Governor Ganesan-i Tsüngremmong salem abener

Dimapur, July 31, 2023 (TYO): Nagaland Governor La Ganesan-i Aortem den Tsüngremmong benjung salem osang lemsatepogo. Tsüngremmong ya alu marohdang Tsüngrem nem tenüngsang agüja aser temoatsü meshia amonger. Iba benjung

nung tesentaktep akangshiteper aser longjemshir, ta Governor-i sangdong ka nung ashi. Asen lima nung yimjung, temeim aser azükaru alitsü atema iba benjung temoatsü asenok taküm nung lidakjangma ta La Ganesan-isa ashi.

GPRN ajanga Inoli M. Joycey asükhu lemsatep

Dimapur, Chiteni/July 31 (TYO): Inoli M. Joycey mapang talangka shiranga arur July 30, 2023 nü iba lima nungi lemsateper, ta Government of the People's Republic of Nagalim (GPRN) sangdong ka ajanga ashi. Temolungtetba tulu nung asür Inoli M. Joycey ya linük tenzüka wadang nung August 18, 1996 nung tenüng zülüok. La

ya July 1, 2017 nung Tatar shim. Lai akok tashi agi tasünü tashi linük tenzüka liasü, ta ashi. Linük asoshi lai anibelem mesasai inyakba ya teti bilemtettsü aser asen temolung nung alitsü. Kinungertem molungjang nung tesuneptsüba agüjang aser asür tanüla teti tatem maka tesunep nung anisüngzükjang ta sarasademtsür, ta sangdong ajanga ashi.

Kaket ka tenüng agi "Tesangwa" sayaogo



Indisen Baptist Arogo tenla kidang "Tesangwa" kaket sayaba mapang kaket sayatsür Dr.T.Lima Jamir (tiyong), kaket zülur Rev.Dr.Temjen Ozüküm (abelenlen) aser Rev.C.Walu Walling par asem külemi agiba noksa ka yangi angur. (TYO, July 31, 2023).

Dimapur, July 31 (TYO) : Tanü Tentonü (Monday) yangi Indisen Baptist arogo nung sannüker Rev.Dr.Temjen Ozükümi züluba kaket ka tenüng agi "Tesangwa – Yisu Khristaji Tesangwa" Northeast Indigenous People's Forum nung mendenbuba yariba Dr.T.Lima Jamiri sayatsüogo aser Rev.C.Walu Wallingi iba kaket meshiteta sarasademtsü. Iba kaket ya kaket züluri pa sannükba wadang nung mazüangi

liaka, ano nungdakba nübertem tanela nung ajungshia tamang tashi itdaksütsü asoshi bilema züluba kaket ka lir. Iba kaket sayaba sentong nung kaketzüluri kaket züluba nükjidong lemsatep aser Indisen Baptist arogo nung deacon Wb.Nüngsang Longkumeri arogo tenüng nung kaket zülur nem tenüngsang agüja pelaba lemsatep. Indisen arogo nung tezülur Wb.Neken Kichui iba sentong len ania liasü.

Minister Kruse-i Pfutsero nung Centre lapoktsü

Dimapur, July 31, 2023 (TYO): Women Resource Development and Horticulture Minister Salhoutuonuo Kruse-i July 29, 2023 nü Pfutsero Cluster nung Fruit and Vegetable Processing Centre lapoktsüogo.

horticultural sectors atema sentong aika tenzüksüogo. CWWS-i governmental aser non-governmental agencies den külemi yaritepba atema pelar aser nenok ajanga Naga tsürtem ajungmesor" ta Kruse-isa ashi.

Iba sentong nung Minister Kruse-i Chakhesang Women Welfare Society nem tenüngsang agütsü. Iba Centre lapokba ya Chakhesang Women Welfare Society-i mapa tulu ka inyaktetba lir aser iba ajanga tarutsü nung takok jenti angutsü, ta lai ashi. "Chief Minister Neiphu Rio- i aniba sorkari agricultural aser

Iba sentong nung 16 AC Pfutsero MLA Dr. Neisatuo Mero-ia o jembidang Pfutsero jila kanga renlokba indang ashi. "Pfutsero jila temekong aser tsüngsang-mopung kanga tajung lir. Nagaland nung süngjanglijang aser aonsotsü teimtiba adokdakji Pfutsero kümdaksütsü mangdang lir" ta MLA Dr. Mero-i ashi.

Modi sorkari Manipur tensa azüoktsü memetet: Kharge



New Delhi, July 31, 2023: Hombarnü Parliament House Complex nung senden ka nung tawa Manipur semdangher INDIA teloktep nungi MP temi Congress Tir Mallikarjun Kharge, party lenir Sonia Gandhi aser Floor leaders nem Manipur semdangba osang metetdaksü dang tangokba noksa nung angur.

New Delhi, Chiteni/July 31 (Agencies): Hombarnü Rajya Sabha nung opposition lenir aser Congress National Tir, Mallikarjun Kharge-i, Narendra Modi sorkari Manipur nung tensa azüoktsü memetet ama reprangteter, aser ibaji Parliament nung sangdong tejangja magütsüba ajanga kuli sayur, ta ashi.

Congress densema opposition party balala nungi MP 21-i anogo ananü Manipur semdangba sülen Kharge-i, Manipur nung tensa mesüngjemteter saka Modi sorkari iba atemaji mebilemtsür, ta aitsü.

Parliament House Complex nung senden ka nung Manipur semdangher INDIA teloktep nungi MP temi party lenir Sonia Gandhi aser Floor leaders nem Manipur semdangba osang metetdaksü dang Kharge-i, opposition teloktep INDIA

nungi MP temi Manipur semdangba mapang nung temelung raksatsüsa otsü aika angashiogo, ta pai ashi.

Kharge-i, tai maket tanur 10,000 densema nisung 50,000 dak tema relief camps nung lir aser item camps nung mozü, chiyungtsü aser nungdakba facilities peria mali, ta metetdaksü.

Paisa, rongsenketzüng dak sendakba maparen ajak anena lir, tanurtem school-i mouteter, aluyimertem alu nung mapa meinyakteter, nüburttem senotsü tsütsü takoksa nguogo aser timtem aika ajurur, ta metetdaksü.

Ato kilonser, Narendra Modi aija Kharge-i, "Kin tsüngda telemsa adokba ya tebilemtsü tuluka lir. Ato kilonseri election sentongtem, train semzüksüba sentongtem aser BJP sendentem nungbo denteter saka Manipur nungher tejashi aser timtem atema

jembitsü asoshibo mapang mali aser kin tsüngda mangatettep bentettsütsü atemabo mapang mali," ta metetdaksü.

Opposition MP 21-i anogo ananü Manipur tesem balala sema senzüba sülen July 30 nü state Angh, Anusuiya Uike ajurua temepishiba shidi ka agütsüogo.

Congress MP aser general secretary in-charge of communications department, Jairam Ramesh-i twitter ajanga, "Manipur nungher tejashi, tetsüba aser timtemji ajanga Ato kilonser melung marakzür ama reprangteter," ta ashi.

Paisa, "Pai pasasa pa o mazüngi angar aser India nungher crore aika nem kangshia pa indang 'Mann ki Baat' angadaksüba mapang nung Team INDIA nungi MP 21 bo Manipur Angh den 'Manipur ki Baat' indang jembü," ta metetdakja liasü.

2012-2021 tsüngda tzümetsüng lendong nung nisung 17,000 asü

New Delhi, Chiteni/July 31 (Agencies): Hombarnü Parliament nung Centre sorkari, 2012 küm nungi 2021 küm tashi nung India nung tzümetsüng lendong nung nisung 17,000 dak tema asü, ta metetdaksü.

Minister of State for Jal Shakti, Bishweswar Tudu-i, tzünglu sashia aruba aser jila/yimitem nung planning majungba tongti kulitem ajanga jilatem nung tzümetsüng, anungji kilentzü atema mapatong tasen benoka inyaksü nungdak, ta metetdaksü.

Rajya Sabha nung tasüngdangba ka langzü dang Minister of State for Jal Shakti, Bishweswar Tudu-i, 2012 küm nungi 2021 küm tashi nung India nung tzünglu sashia aruba aser tzümetsüng lendong balala nung nisung 17,000 dak tema asü, ta metetdaksü.

Central Water Commission

(CWC) ajanga renemba report Parliament nung metetdaksü dang minister-i, 2012 küm nungi 2021 küm tashi nung tzümetsüng ajanga ki, alu nung aonsotsü aser sorkar kiojen raksaba ajanga sen crore 2,76,004 shi takoksa angu, ta metetdaksü.

Jilatem nung aser tzümetsüng bulua atalokba tesemtem nung tzümetsüng nokdangtsü atema sorkari mera aika benoka inyakogo, ta minister-i metetdaksü.

Paisa state/Union Territories den senteper inyakba mapatong "Master Plan for Artificial Recharge to Groundwater - 2020" metetdaksüba den külemi tzünglu tzu rizünga ayutsü atema linük tesem balala nung Rainwater harvesting & artificial recharge structure crore 1.42 yanglutsü aser tzu 185 Billion Cubic Metres (BCM) rizüngtsü sentong metetdaksü.



July 31, 2023 nü Gurugram nung Bharat International Cultural Centre amenoktsü atema meshitetba 'puja' nung Road Transport & Highways Union Minister, Nitin Gadkari-i shilem agiba noksa nung angur.

Jaipur-Mumbai Express train nung RPF constable kati nisung 4 khaset

Mumbai (Maharashtra), July 31 (Agencies): Hombarnü Maharashtra state nung Palghar railway station anasa Jaipur-Mumbai Express train nung Railway Protection Force (RPF) constable kati RPF ASI ka den passenger asem khaset.

Train ji Jaipur nungi Mumbai-i aoba mapang nung train telung nung constable jagi pa meyong prangpong agi RPF ASI ka densema nisung pezü khaset.

Western Railway-i sangdong ka ajanga, "ASI asür,

Tikaram Meena'er kibong nem Railway Surksha Kalyan Nidhi nungi sen lakh 15 agütsütsü, asüpila sentong atema sen 20,000, Asüba aser Retirement Gratuity sen lakh 15 agütsütsü aser General Insurance Scheme nungi sen 65,000 agütsütsü," ta metetdaksü.

Osang angazükba agi, constable aser ASI na tsüngda mangatettep adoka raraba mapang nung passenger kari nokdangtsü meranga liasü, iba mapang nungi constable jagi

ASI den passenger asem dak injang khalokja khaset.

"Anepdang 5:23 ako meta nisung teimbaka mesaki lia RPF constable jagi RPF ASI den passenger asem khasetba sülen train nungi pungzüka ajen. Tai tonglokja alisang constable den prangpongji puogo," ta Western Railways-i metetdaksü.

RPF-i sangdong ka ajanga, iba tatalokba osang DCP North GRP nem metetdaksüogo aser bushisüngdangba maparen tenzüokgo, ta metetdaksü.

Congress bangdaki Karnataka nungi lenirtem den senden amentsü

Bengaluru, July 31 (Agencies): Hombarnü Karnataka Deputy Chief Minister, D K Shivakumar-i, August 2 nü Delhi nung kanga tongtibang senden ka amentsü aser iba senden nungi Congress bangdak lenirtemi Karnataka nung minister tem aser party lenirtem den 2024 küm Lok Sabha election atema asalentong yanglutsü, ta metetdaksü.

Karnataka Congress telung nung mangatettep adoka aliba mapang ka nung party bangdaki iba senden ayongzüker.

Karnataka nung Congress MLA 30-i Chief Minister Siddaramaiah aser party lenirtem dang parnok constituencies nung terenlok mapatem meinyakba aser minister kari junga meinyakba atema melung masüba lemsatepogo.

Osangbenertem den jembidang D K Shivakumar-i, candidates shimtsü, Parliamentary election atema teinyaktsü mapatem aser party ticket alemtsü onüktem ya kanga tongtibang, ta ashi.

August 2 nü senden nungi Congress Tir, Mallikarjun Kharge, Rahul Gandhi aser General Secretaries K C

Vengopal aser Randeep Singh Surjewala nungher adentsü.

Party nung melung masürtem aliba ajanga iba senden ayongzüker asü?, ta asüngdangba langzü dang Shivakumar-i, "Yamaji masü. MLA kari CLP (Congress Legislature Party) senden ayongzüksü mepishia liasü; ajioda iba sendenji taoba hopta menogo," ta metetdaksü.

CLP senden nungi MLA, B R Patil-i, minister kari teinyaktsü shidak meinyaker, aser ibaji memetongshira parnoki maneni tim mesüi inyaksü, ta metetdakja liasü.

Iba dak sendakba nung osangbenertem den jembidang, Shivakumar-i, Patil ya party nung kanga tongtibang lenir ka lir aser kanga teshisadang akaba lenir ka lir, ta ashi.

Paisa, Patil-i mepishiba nung ajemdaker CLP senden ayongzüka liasü, aser pai senden nung lemsatepba tebilemtsü onük atema inyaksü onoki melunga dang lir, ta ashi.

Taküm May ita nung agiba Karnataka Assembly election nung Congress-i menden 136 nung takok ngua liasü; BJP-i menden 64, JD(S)-i menden 20 aser tangartemi menden pezü angu.



New Delhi, July 31, 2023: Hombarnü Parliament House Complex nung Union Minister Piyush Goyal, Asom Gana Parishad MP. Birendra Prasad Baishya aser tangartemi osangbenertem den jembidang tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, LUROI(AUGUST) 01, 2023

Ibai Tsüngremmung !

Tanü nungi anogo asem nü Aotsür Aoertem akhi tsürabur mapang nungi munga aruba benjong Tsüngremmung amungtsü. Atangji, akhi tsürabur mapangbo iba Tsüngremmung ya anogo trok nü munga aru ta angazük saka Khristan yimsü aruba den ano kaketshisatsü dena angazüka tenzük dang tangatetba tajung kati arua Ao Kaketshir Mungdangi anir Tsüngremmung dang masü saka Moatsü dena anogo asem dang amungtsü lemtetba agi, tanü tashi Tsüngremmung ya August ka nungi asem nü tashi amunger. Benjonga süaka Tsüngremmung yabo balaka kechiyong yabo Moatsü ama masü kanga anemponga amungba mung lir. Iba jagi, akhidangbo kibong nung anempongba tamaitü süngjung tapu ka bener arua kima tongshi nung alenlokasa yutsü. Iba jagiang tangari par kibong anemponger ta metettsü aser mashi mekaotsü aser manenzüktsü. Aji oda, benjong asüyonga anemponga amonger asünungji Tsüngremmung mapanga yamaji tsüraburi benschia aru. Tanübo asenoki tenüng agi Moatsü aser Tsüngremmung amunger dang ashi shitakba asen akhi tsürabur mapang nungi munga aruba benjongmung amungba tetezü angateta mamunger. Atangji, tanü asenoki moatsü aser tsüngremmung benjong metsünga reta bilema mamongbaji tsük lu mayimba ajanga lir, kechiyong asen tsürabur sobaliba benjongbentsü ajak ya tsük lu ayimba den sentaktepa lir. Aji oda, tanü putu nung asenok mapa tapu balala inyakba amai masü saka akhi tsürabur mapangbo anogo shia nisung ajak inyakba mapa tapu ka dang liasü, aji tsük lui aotsü, anungji shingaia shinga dang ' na kechi inyaker ? Tanü na kongi aotsü ? ta asüngdangtsübaji nungdak mali asü. Iba ama putu ka nunga asen tsüraburtem o Tsüngrem na tsüngda tesendaktep liasü. Aji oda, temoatsüa aser temerenshia Tsüngrem nungi arur ta asen tsüraburtemi angatet, anungji alu mapa ajak nung Tsüngrem akhümtsübua inyaktsübaji parnok tamang mapa liasü. Tanübo asenok putubo balaka, kechiyong tsürabur mapang ama yimer ajak pei yimtak dang septeper malir aser anogo shi inyakba mapatema tsük lu ayimertem dang nungibo tanga lu ayimer aser tanga mapa inyaker teimba kümogo. Aji dang masü saka mapa inyakba nukjidonga balala kümogo, kechiyong akhidangbo anogo shia pei lui aobaji pei bok mesütsü asoshi dang liasü saka tanübo asenoki inyakba mapatem ya pei bok mesütsü asoshi dangbo masü saka tangar asoshi mapa ka nung mesüra ka nung teyari agüja tenzük aser item mapa nungi anguba taa agi asen kibong dang masü saka asen lokti, arogo aser yimten yarir. Iba amai asenok mapa inyakba sobaliba nung temelenshi aika adokaka, asenoki asen akhi tsüraburtemi munga aruba benjongbentsü tajung aser tulu ana, moatsü aser tsüngremmung, mesendoki munga aruba tetezü ya benjongmungji dang masü saka asenoki Tsüngrem mesendokba tamaitü asütsüla. Ashiko, tanübo asenok aikati asen taküm aser mapa nung Tsüngrem ali mali memeteti alitsü akok, iba jagi balaka asenoki asen tsüraburtemi amangba ama benjongbentsü amungdanga aser mamungdanga mamangteter. Asenok atemabo kechi benjongbentsü südirsüaka benjongbentsüji yi jema japujaria amungba anogoa ta bilemer. Iba jagi arogo nung lenirtem karibo moatsü aser tsüngremmung amungtsüba ya nungnanger. Atangji, tsürabur mapang nunga yi tajung yanglua yur jemtepa amungtsübaji benjong dak aketba shilem ka liasü, kechiyong yiji parnok asoshi anogo shia chia-ajemba chiyongtsü ka dang liasü. Ajisüaka, asen tsürabur otsü nung yi jemajema yi lar akümba otsü mangashir aser yi majembo teka atentenba agi kecha meinyaktet timtemba indang o nunga aser ken nunga enoksema jembiba aser atenba mangashi. Item tsürabur tamang, tazüokba aser sobaliba tajungji tajungba tajungba meyushia asenoki asen putu dak apet tsüngremmung munga Tsüngrem tenüng asangtsübaji tanüa asen sobaliba asütsüla. Iba jagiang Tsüngrem peladaksütsü aser atangji Tsüngrem pelabaji asen tashi asütsü. Iba tangatetba nung asenok taküm küm-a kibong shia nung Tsüngremmung mungdi.

OLEMSABANG

TSÜNGREM MONG

- I.Shilu Jamir, Naharbari, Dimapur, July 2023

(Maneni yashi adok nungi...)

Asangurtemi anir yikoben süng agi yangluba nokleptsü tasen nung ang nemnem angsü temesüng agi yanga yanglur aser akartemibo yongmenjang azük azüker meyua longsotepa pelatepa yim mepu tiyong tonga bener adoka ayutsü. Iba anogo item maparen aja ayanga inyaktepba tensa nung asangurtemi pei meima aliba ayir nem mokopong tasen chitetsütsü aser ayir temia pei miema aliba asangur nem ang nemnem temesüng agi nokleptsüyi tasen yanglua sempettsü.

Yamaji tsürabur putu tensa benjong mongpu meteta ayir shibai ang mesungji tiemba yanglua agütsüdir ta toktep dang amang nung mejanga amoa moi benjong shizüka meranga inyaktepba yimya tajung benschia aru aser yamaji inyaka yanglua agütsütepba jagi parnok tsüngda anikilen asoshi kuli tajung agitepa kibalembutepa lia aru. Yamaji tsüraburtemi benschia inyaka aruba asen Aoer sobaliba tajung rizünga renema yuja lir. b. Z ü n g a Yongya Mong (Tananü): Iba anogo anepdang yakta arju Tir kidang putu yimsüsür mepu zünga kidong shia kidong tambo kidang ak tulu tepseta yimsüsür ajak, yimkong jaoka benjong yongya atatsü. Anepdang chiyongkiong temer anüngdang ajak anüngsa lenden nung atenshia tsüngsangtepa asaya yimya tapu balala toktepa sendong agi longso lungpena amungtsü. Ayir asangur tembo shizüng tsüktepa, saisaponga tapu palala saitepa longsotepa pelateptsü. Longsotepa lemsatepa pelatepa chia jemtepa benjong amongba agi Tsüngrem peladakja nübür moatsür ta züngshitepa inyaka lia aru.

Anüngdang chiyongkiong temer külen anungsa lenden nung yimer ajak atenshir yartsüngsang aser asaya tapu palala toktepa asayatsü. Nikongdang joko takar,(sürep lenden taa ajar) yimsüsür, putupur ki maka, yi jema Tsüngrem Mong ken aser süngnaro ken tentepa pelatepa longsoteptsü, aser panüji amang menua dang sentongji tempangtsü.

c. Yatimong (Tasumnü): Tsüngrem Mong tatem nü tetsür tebur arr atsütepa tsüngsangtepa tobur tazünglen tetsür talaklen amer arr ken tentepa atsüteper, Teburi tetsürtem peladakja tetsürtem nemsä kokdaksür. Tetsürtemi ajongtong aser kilang ken tena, teburtemi yar tsüngsang den asaya tapu palala sayua asayatepa amungtsü ano nikongtsütsü nungi sendong palala metenloka aotsü.

Nikongtsutsu nungi Putu yimsüsür ki maka jajatsü iba yati anogo (Tenti anogo) taka taiter ajaki pei kilir jenlir ajak nem süoshi tasen sobotsür chiyongtsü tajung chiyongdaksür pelatepa telok den arua benjongdaksür. Yamaji benjongmong nungtem yimya awashi tajung benschia jagi teyanglur Tsüngrem pelar aser Tsüngrem Mong benjong tetezü abensatsür ta aser Teyar-i nübür moatsür ta amanga züngshia arur.

Joko nikongdang mepu sasep asangurtemi süzung züji tazünglen aam 3 shi alangzuka lepzüker anüka ajensaa shisar teburtem ajaki iba nungji teka keleni amettsü aser teka külen medemer tapupang nung awaloka nokdakteper langtsüngshi luli atuli ta atsüshiteptsü. Shizüngzü teküpoklenji tetsür ajaki ameter atsüshitepa longsotepa alidang Arju nung lungmi milenpong tsükloka bener yimdong ajak yapanga sangwadakja tobur junga sobotsü tabensa sobur milentsüng nungji arudang teburtemi aok atena arü adena mepu tatem kelen nungi kelen tashi tsüngsanga jajatsu. Tetsürtema parnoktsütsü serem sü agi ajak teku züpanga ajena sobur arr ken, ajongdong ken tena awang atena teburtem den jaja longsotepa pelatepa benjongteptsü.

Yamaji jajadang ken kenbo tobur o tetsür na tashi toktepa shizüngzü atsütepdang tetsürtemi oa tesülen nungi tebur aso tulu tashi taitertem dak kelilitsü idangji oda tetsürtemi atsür aor idangji tebur temi makok ta maksüdakja menütepa longsoteper yamaji jilu palala yitepa Tsüngrem Mong benjong moaja mongtepa aru.

Iba sülen Tsüngrem Mong benjong tatem aonung joko tetsürtembo pei pei züki (Tsüki) oa atadang teburtembo amang piyong oda mesangwa tashi ki makaa chia jema tedong tembar nungertem semdanga ajurua longsotepa jajatsü Aji oda pelatepa benjong shizüka longsotepa menungraseta Tsüngrem mong benjongji tempanger yamaji iba benjong tatem aonungji tebur taintemi tedong nung denji ajirütepa/nüklasütepa ajioktepa yimtepa ayur aser tebur o tetsür aika tongtepratepa kibong küma liyonga aor.

14. Aoer Tsüngrem Mong benjong mapang anempong yamai.

- Semki nung tsük masentsü.
- Shizüng aser aam matongtsü.
- Süngkong aser assüm (drum) matemtsü.
- Tsüngtsüng matemtsü.
- Ozümi masongtsü.
- Sentsübrang oset mesobotsü.

Itemji benschia inyakra Lijaba mepelar aser jaksajakben sentsü jagi tsük aponger ta takzü-a benschia aru. Kechiyong alu ajak repra mapa ajak renema inyakteter yur joko alu nung tsük adoktsü yongyaseta ataa dang iba benjong ya amonger eyongji kanga anemponga kümdanga merükteta iba Tsüngrem mong benjong ya kanga ataka monga aru.

15. Benjong tempanger kelen 4 nü buba anepdangji Longkitsüngba süngsem alenloka alibatemi agizüka endoker anempong atemtsü anogo 4 nü buba nüji aien leman aser kiyonger yimtem den sendaktepa aliba leman ajak nübu zünga lemsar len apitsü, Iba ain lenbi nung Arju nung nem a len palaka lemsüka pidaktsür.

16. Panüjibo iba küm kibong tasen akümertemi shi aontem aser amitsür temi lontem renema bentsür. Chiyong temer kelen sobaliba ken tena aser o-tem jembia aser lanurtem rongnung nokchira sayutepba lungmi, süngkum aser azülak jentepa benjong medem pelateper.

17. Iba sülen mapa ajak temer kelen tsüngpo yar terokben (6 times) oli aruli ta yarir kelen ano terok ben ok atentsü ajiser meyua yimdaki adoktsü. Paonungji parnok ajak takar ki maaka yi aser shi anünga aliba ajak chia jemtepa pelatepa tempangtsü koba dang Yisang alok ta ajar. Yamaji küm shi August ita 1-3 amongba Aoer benjong tuluba Tsüngrem Mong mongtepa otsü tongmelang agi lemsateper.

Tulusang Tsüngremi Tsüngrem Mong amonger nübür moajang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yirusalem nung Khristan em anema inyakba anentsü mepishir



Israel kubok Haifa yimti nung aliba 'Cave of Elijah' noksa nung angur. Ainkar Elijah-i iba lungki nung Ahab Chuba aser pa kinungtsü Jezebel na dang nungi atsüka liasü.

July 31, 2023: Yirusalem aser Haifa na nung Khristan lenirtemi, Yihuda nungertemi Arogo lenirtem, Tenla kitem aser temeshi tesemtem anema inyakba anentsüla, ta mepishi.

July 28 nü Justice & Peace Commission of Assembly of Catholic Ordinaries of the Holy Land-i sangdong ka ajanga, "Tawa ita ishika Khristan lenirtem, Tenla kitem aser temeshi tesemtem anema inyakba kanga bulua akümba ajanga Khristanem, talisa Yisusalem aser Haifa nung aliba Khristanem kanga tsübur," ta metetdaksü.

"Yimsü alia amanger Yihuda nungertemi metsü metsüloksüba, o tamajung ashiba, teka sangshiba, Tenla ki bendoktsüba mesüra Tenla kidang zülusatsüba tatalokbatem kanga bulua kümogo," ta Justice & Peace Commission-i metetdaksü.

"Tia maka, tesüiba mapang ama masü saka tangbo ozüing benokba agency balalai aibelenertem mejangjateter aser meputeter," ta Commission-i metetdaksü.

Tang tesüsa Haifa yimti nung Mount Carmel nung aliba Stella Maris Monastery atema

Yihuda nunger aser kümra tesüsabo Nablus aser Hebron nung atalokba ama parnoki iba tesem agiadoktsüa akok, ta bilemer," ta Commission sangdong nung shia lir.

Temeshi aini aoba tesem-Stella Maris Monastery ya 1631 küm Catholic Carmelite putirtemi amenoka liasü aser küm shia Khristanem densema yimsü balala amanger noklang aikati iba tesem semdang. Iba tesem nung Tenla ki-a ka yanglua lir.

Iba tesem nungsa ainkar Elijah nungtem nung 'Cave of Elijah' yanglua lir. Tawa-tanü ka nungi Orthodox Yihuda nungertemia iba tesem nung arua sarasademer.

June ita nung Khristan aser Yihuda nunger na tsüingda iba tesem nung mangatetep adokba sülen Yihuda nunger iba tesem nungjagi meindoka liasü.

Haifa yimti ya akhidang Arab aser Yihuda nunger na tsüingda raraba tesem lir, ajisüaka tangbo iba yimti nung Abrahamic yimsü asem (Khristan, Musilim & Yihuda) amangertem tesünep nung litetba atema tatishitsü amshir.

"Khristanem aikati, Khristanem meyong tesem nung ya nütsüing ajema alirtem tanem-tanemi nütsüing teimba

Commission-i, Israel-i senso ajak nem yimsü temeden agütsür ta jembir, ajisüaka tawa Khristanem anema inyakba ya ajanga iba kuliji magütsür, ta ashi.

"Linükisa sensotem kümzüksü aser ozüing shidak benoktsü ta ashir, ajisüaka ozüing alema inyakba kanga bulua akümba ya mangateter," ta commission-i metetdaksü.

"Ozüing alema inyakertemji teimbaka lanurtem lir aser karbo kanga tanurtem lir," ta kasa sangdong nungsa shia lir.

Yihuda nunger temeshi aini Stella Maris Monastery-i aoba anema Khristanem noklang aika Haifa Tenla kima lenmang mokdang longkak aita liasü.

Taküm Yirusalem aser Galilee nung Khristan lepertem aser temeshi tesemtem amakba aser raksatsüba kanga bulua kümogo.

Khristan lenirtemi ashiba agi, yaküm sorkar tasen amenokba sülen nungi Khristanem anema inyakba kanga bulua kümogo.

ANOGO ABEN TSÜNGREM DEN

Ozüngji Tenang

T.Ken 119:49-56

Ken atenba tanur tain ajaki anganer. Choiri atenba, teloki atenba ken, kati atenba ken, anati atenba ken, pezüi atenba ken, tetsür ola, tebur ola- ken tener telok balala aika lemsa atener. Saka Tenüngsang Ken 119:54 nung ken züluri ozüing atenba indang zülü: "Kü temeshi aeni aoba kidang ne telatet ozüingtem kü ken lir." Ken züluri ashir, "Ne ozüing ni atentsü."

Iba tekongi taküm tsütsü tangatetba balala asem indang ashir. Tanur ka dangi, takümji tepuokdak ka mesüka lir, kecha maka, saka tzüzüing ozüingdang. "Ibai teinyak. Ibaji teinyak. Iba jagi tuo." Asenoki tanurji kumdangdaksütsüla, idangji dang parnok tain kümer parnok sasa parnok taküm lia otettsü. Lanurtem ya taküm nung telok ka lir. Parnoki ozüing maginer. "Kü dang ya teshi," ta parnoki ashir. Parnoki kentemji dang aginer. Saka kodang asenok tain kümder, takümji tepuokdak ka masü mesüra telok masü ta angatetter.

Ibai aeni aoba ka lir. Asenoki Tsüngrem O nung tashi angaa iba aeni aoba ya jajar. Laishiba leniba maten asübo iba taküm tepiyong ya kü taküm kong lila ni meshitet. Tsüngremer O ji khuret ka masü; ibai temoatsü ka lir. Kodang nai takümji Tsüngremi mulungba nem agütsüdir mapaji jangratemtsü ka asütsü.

Tsüngrem nungi pilar takümji telok ka dang mekümdaktsüli. Ne takümji aenlen jajar ka ta angajemang, aser iba lima nung aener ka ama aodang, na Laishiba leniba nungdak ta angatettang.

Tanü na aenlen jajadang timtem ajurur asü ? Tain tangatetbaji agiang- Tsüngremi mulungba nem agüjang aser Pa O tesayuba bushiang. Ibai metenra nai ne lemanng samatsü.

Yimyu Baptist Arogo nung merükmejuba sentong ayongzüka agi



Mokokchung, Chiteni/July 31(TYO): Amongnü Yimyu Baptist Arogo nung Yimyu Ward Sanitation Committee aser Yimyu Baptist Arogo longjemer Ward nung merükmejuba mapatong inyaka aotsü asoshi sentong ka "Nenok Merüka Liang" Isaia 1:16 nung amendaker sentong ka kaogo.

Iba sentong nung tongti o jembir Wb.Akok Walling ajanga omen nung amendaker jembidang pai, meimchir aliba tesem merüka alitsübaji kanga dang nungdaker, saka ano iba denji külemi meimchir ka asoshi pei alishi temang aser tanela jenjang nung merüka alitsübaji kangasa tongtipangtiba lir, ta

ayongzüka. Sentong nungsa Yimyu Ward Sanitation Committee Chairman, Aolepden-i iba merükmejuba mapatong nung nübur ajaki yariteptsü ajungshia jembiba aser iba mapatong takok ngudakja nübur ajangzükdakjang ta Tsüngremi lenisüba temoatsü jazüka Yimyu Baptist Arogo Pastor Wb.Puryapang-i sarasadema liasü.

Iba sentong akaba nungtem nung Yimyu Baptist Arogo Child Department pur tanurtem merükmejuba tsütsülen noksa yangluba tetoktepbba aka aser tajungtiba nem tenüngsang senpet agüja tushia liasü.

Assam Valley Baptist Mission (AVBM) Foundation Day among



Nakachari, July 31 (TYO): Hombarnü Jorhat district kubok Nakachari nung Assam Valley Baptist Mission (AVBM)-i AVBM tenzüka sülen küm 18 ajungba Foundation Day mongogo.

Iba sentong nung AVBM kubok züngsem Arogo 54 nungi Arogo lenirtem 225

aden. Iba sentong nung Dimapur Ao Baptist Arogo (DABA) nungia pastor ana- Rev. I. Wati aser Rev. Wati Kichu na den Lanutoshi Walling, Deacon nunger tejaoker ama shilem agia aden. Iba sentong nung DABA pastor, Rev. I. Wati-i

Tsüngrem O jembi aser Rev. Wati Kichu-ia o tatsüka jembia liasü.

Iba sentong ya AVBM Evangelist, Huni Gogoi leniba nung agi aser Youth Counsellor & Youth Pastor, Aamong Phukan-i Mission report aser Youth Ministry report metetdakja liasü.

AO OSHI ANGAZÜKDAK:
TANÜ ANGAZÜKTSÜBA OJANG



Rokong

(adj) timtem tekangshi, tuokrong (in trouble, distress)

* Onok tanur asüdang kanga **rokonga** ali.

Roksep

(n) terok mesadem, ola junga madoker (hoarse voice)

* Ni **roksep** asüba agi ken junga metenteter.

OLONG PAITEP # 6593

1		2			3		4		5
				6		7			
8									
						9			
			10						
11									12
					13			14	
15									
16									17

TIPIEN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6592 TELANGZÜBA

TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.



2023 JULY ITA LILI RESULT !

July ita nung Lili tajungtiba (First) shimteta tanü yangi lephsia agütsür. Lili zülur-i August 10, 2023 tashi nung Tir Yimyim Office nungi senpet agizüktsü mepishia metetdaksür.

ALOKBA O WARAKLA NA PARTY KA NUNG :



Warakla : Aya tambu, na ya tan agi pezü ben buba chiyungtsü abeni serving table-i oya angur akoti, tangari koma pilem ya lidir.

Alokba : Hehehe, ni chiyungtsü abeni aoba shia ya na atemaa ta sa shir bener arur akoya.

Warakla : Oh Alokba, mekümtetka!

~ Lilir : WhatsApp

Manipur-i political tesendaktep maliba officers yoktsü: SC



New Delhi, Chiteni/July 31 (Agencies): Manipur tensa tajungba nung meteta yariteptsü asoshi yimtenren tsütsü tesendaktep kecha maliba officers team ka Supreme Court of India-i yoktsü renema lir.

Manipur nung atalokba video ka alima sünga prokshiba indang ken o Hombarnü (July 31) jembidang Chief Justice of India (CJI) DY Chandrachud-i iba osang ya metetdaksü.

Supreme Court ajanga shimba ketdangsur telok nungya tetsür aser tebur

obendangertem aser takotet nisungtem alitsü.

"Ibai Nirbhaya tensa ama masü, kong tetsür ka dak tashiyim agi shi nung medem - koba kanga majung liasü saka nisung ka kija liasü. Yangi (Manipur azüdokshi) asenoki tasa yangla azüdokshiba indang jembir, koba IPC ajanga 'separate offence' ama züngshir," ta CJI Chandrachud-i ashi.

"Anungji administration nung tanaben tamang katettsü atema court-i shimba team kati

nüburtem asoshi tematiba court-i süoki ia bilemstür ta ashitsü. Yimtenren tsütsü tesendaktep maliba ketdangsurtem yoktsü," ta pai ashi.

Manipur nung tetsür ana tashiyim amshia mangsa anir senzüba indang video indang jembidang, "CBI, SIT nem nungloktsüba kisungji teperi masü," ta CJI ajanga ashi.

"Lar kishizüng tashi obendangba maparen tonga aotsüsa asenoki inyaktsüla. Asenok mapang süyitemer, ita asem süyioyo," ta CJI Chandrachud-i ashi.

Sorkari tang tashinung inyaka aliba den apet Supreme Court-i teka sangshitsü, ta CJI ajanga ashi.

"Sorkari inyaka aliba nung onok temolung süra, onoki teka mesangshitsü," ta CJI DY Chandrachud-isa ashi.

Rohingya nunger ozüng alema India-i aitdaksür nisung 8 Tripura nung apu

Guwahati, Chiteni/July 31 (Agencies): Ozüng alema Rohingya immigrants tem linüki aitba dak sendakba nung Assam Chief Minister Himanta Biswa Sarma-i tuyuba ama Special Task Force ajanga Tripura arütsü anasa aliba district tem nung operation ka agia STF case No. 01/2023 U/S 120(B)/121A/153A(1)(b)420/468/471 IPC R/W Section 12(1)(a)/12(1A) (a)(b)/12(2) of the Passport Act dak sendakba nung nisung ti apu.

Iba operation ya ASP/Dy.SP level Officers tekolak sür police team pongui Tripura arütsülen agia liasü.

Iba operation mapang ozüng alema taila ID aser senzüsempodang amshiba documents

Rohingya Muslim nungertem

India litsü aittsü asoshi ayokba nung shilem agia lir südi ta temolung melemi nisung ti apu. Illegal Rohingya Muslim aser Bangladesh nungertem India senso ama sayutsü asoshi parnoki item documents ya yanglu, ta ashi.

Iba inyakim ya national security asoshi timtem tulu lir ta züngshir aser parnoki illegal Rohingya immigrants tem Kumarghat Railway Station (Tripura) nungi Delhi-i aoba train tem nung yokba nung yaritepa aru.

Item nisungtem yagi Rohingya nungertem ya ID aser documents taila yanglua agütsür Dharmanagar, Kumarghat (Tripura) aser Badarpur (Assam) nungi Kolkata/Delhi/ Hydeabad/ Bangalore leni aoba train tem

nung amentsü meiner ao, ta ashir.

STF Assam ajanga apur par ti rongnung Uttam Pal, Kajal Sarkar, Sagar Sarkar, Pervez Hussain alias Abdul Hussain, Shib Sankar Ghosh alias Boto aser Kartik Nama nunger ya Tripura nung alirtem liasü.

Parnokisa Bangladesh nungera ana apu aser tena ya Chandpur nungi Md Shahadat alias Sahadat SK aser Chittagong, Bangladesh nungi Bijoy Barua liasü.

India anema inyaksangshiba nung shilem agia alirtem aputsü asoshi ano maneni bushisüngdangba mapang lir.

Ano Rohingya nunger yaria iba ama taila ID aser documents yanglurtem (touts) aputsü asoshi linük tesem balala nung maneni operation agitsü.

ITLF women wing ajanga Moreh nungi police agientsü akhanger

Churachandpur, Chiteni/July 31 (Agencies): Moreh nungi State Police agienang ta takhangba agüja Indigenous Tribal Leaders Forum (ITLF) women's wing züngsemtem Manipur kübok Churachandpur nung mener longkak aiter.

Moreh jila nungi state police tem magienra Manipur nung aliba hill district ajunga nung longkak ait tenzüktsü, ta

Churachandpur nung mener longkak aiter temi amokmeren.

Longkak aiter telok tuluka süoshi tanak semer July 31 nü Churachandpur nung adenshia Moreh nungi state police agientsü atema takhangba maneni agüja liasü.

July 28 nüa Manipur kübok Tengenpual district nungi Kuki-Zo tsürtem meyirijang aika aonung highway tiyong nung

mener chiyongtepa state sepaitem Moreh jilai aiba nokdanga liasü.

Manipur sorkari Moreh jilai state sepaitem yoktsü merangba sülen tensa mejungi akum.

Indian Reserve Battalion, Manipur Rifles aser Commando personnel densema state security forces gari ter nung Moreh jila leni aodang tetsürtemi Tengenpual nung nokdanga liasü.

GOVERNMENT OF NAGALAND
DIRECTORATE OF INFORMATION & PUBLIC RELATIONS
IPR CITADEL, NEW CAPITAL COMPLEX
NAGALAND, KOHIMA
NO.DIPR/GEN/2023
Dated Kohima, the 31st July 2023
ADVERTISEMENT
This is to inform all the Departments that have organized Programmes/Events in commemoration of Azadi Ka Amrit Mahotsav (AKAM) to submit Photos/Videos to the Department of Information & Public Relations, Nagaland, for documentation and further necessary action. Therefore, the Department requests all the Departments to submit the materials on or before 8th August 2023 without fail.
The material may be mailed to iprngl@gmail.com
Contact No. 9774421583
Sd/-
DZÜVINUO THEÜNUO
Director
Information & public Relations
Nagaland, Kohima

Wagner-i züngsem tasen manisemtsü: Prigozhin



Yevgeny Prigozhin

URA.RU

Minsk, Chiteni/July 31 (Agencies): Wagner mercenary telok tekolakbai ashiba agi, parnok Africa aser Belarus nung maneni inyaksangshitsü ajisüaka tangbo züngsem tasentem manioktsü.

Parnok telok taruba jenjang kechi agitsü aji tang telemtetba agidar, ta Yevgeny Prigozhin audio osang ka ajanga ashi, koba Wagner den sendaktepa aliba Telegram account ka ajanga sangdonga liasü.

Russia-i Ukraine amakba mapang Wagner telok nungi sepaitemi tongtibang shilem agiogo.

June ita iba telok nungi sepaimeyirejang aikati Russia indang military lenirtem anema nokdaka liasü.

Audio osang nung Prigozhin-i, Wagner züngsemtem timba tang leave nung lir, kechiong parnok mapang talangka kanga beleva mapa inyakogo, ta ashi.

Paisa, par teloki tang taruba jenjang agitsü atema telemtetba agidar, koba Russia ajungkettsü atema asütsü, ta ashi.

Iba telok ya tang Africa aser Belarus nung training centre tem nung inyaksangshidar, ta paisa shisem.

Wagner pur Africa kübok tesem balala nung inyaksangshidar aser Belarus nunga territorial defence forces nem training agütsüdar, ajisüaka pai osang tejangja melemsatop.

"Onok nübu agi anünga mali aser züngsem tasen anioktsü asoshi kecha tebilemba mali. Ajisüaka Russia-i kodang telok tasen ka nüngdaktir indangji onoki züngsem tasen anisem tenzütsü," ta Prigozhin-i ashi.

Maneni paisa, par telok nungi züngsemtem Russia nung tanga telok ka nung oa adentsü asoshi kecha tenokdangba agüja mali aser tia maka karibo iba telemtetba agiogo, ta ashi.

June 24 nü military lenirtem anema nokdakba sülen tir Vladimir Putin-i iba telok nungi züngsemtem shirnok sorkar anema nokdakba nung densema maliasü, parnok dang Russian defence ministry den tenangzüktepba yanglutsü jaoka liasü.

Myanmar Junta-i emergency ita 6 atsülangtsü

Yangon, Chiteni/July 31 (Agencies): Myanmar nung military sorkari taruba kum January 31 nü tashi state of emergency atsülangtsüba sangdongogo, aser iba ajanga takum general election agitsü timla makai kümdaktsüogo.

National Defence aser Security Council-i emergency atsülangtsü asoshi agizükogo, ta junta otongdar Major General Zaw Min Tun-i ashi.

Military tekolakba Min Aung Hlaing-i, election ya August ita agitsü ta sangdonger liasü. 2021 kum Aung San Suu Kyi-i aniba civilian sorkar atsüngtokba sülen sorkar ya tanaben nüburtem nem meyipa agütsütsü nangzüka nung shilem ka ama pai election agitsüba ya sangdonga liasü.

Linük ajunga nung maneni mepetmesü adokyonga aoba aser rongsenketzüng kanga mejungi akümba mapang ka nung tang emergency atsülangba osang ya sangdongogo.

Tawa osang balala ajanga ashiba agi, junta-i Suu Kyi nem temerenshi agütsür aliba ya house arrest ka kümdaktsütsü sentong yangludar.

Kasa mapang nung Hombarnü Myanmar southeast len bomb ka pokdaktsüba sülen nisung ka asü aser nisung 12 yirua liasü, ta ketdangsur kati metetdaktüsü.

Military-i 2021 kum February ita Aung San Suu Kyi-i aniba civilian sorkar atsüngtoka tashiyim agi nüburtem azüoktsü merangba sülen linük nung



Major General Zaw Min Tun

mepetmsü tali kumogo aser iba mepetmsü nung nisung meyirejang aika süogo.

Junta tang anti-coup "People's Defence Force" (PDF) militias aser mapang talangka nungi rara aruba telungurtem den raratepba mapang ka lir.

Hombarnü Thanlwin bridge checkpoint anasa anepdang 6:50 ako shi nung gari ka nung bomb inoker pokdakja liasü, ta Karen State administration council nungi sorkar ketdangsur kati metetdaktüsü.

"Security aser passenger densema nisung 13 shi yirua liasü," ta pai ashi.

"Yirur alirtem rongnung ka mozüki tonga aoba sülen asü," ta paisa shisem.

Iba tatalokba dak sendakba nung ketdangsurtemi osang tejangja magütsü, ajisüaka iba checkpoint ya security kanga akanga aliba tesem ka lir. Kasa mapang nung iba tesem amakba indang tang tashi nung telok kati danga nangzüka mali.

Myanmar nung mepetmesü tenzüka sülen tang tashi nung nisung 3,800 dak tema tepsetogo, ta local monitoring group kati ashi.

JUI-F sentong nung bomb pokloktsüba ya ISIS mapa: Police

Peshawar, Chiteni/July 31 (Agencies): Pakistan kübok tesunep mapakaba Khyber Pakhtunkhwa province nung aliba police temi Hombarnü ashiba agi, Islam yimsü akhanga amshiba party ka indang mungdang nung takum bendanga agütsür amakba ya nokdanga aluba ISIS kiralongrar mapa lir. Deobarnü conservative Jamiat Ulema Islam-Fazl (JUI-F) party nungi züngsem 400 dak tema Afghanistan den arütsüa aliba Khar jila nung senden ka atema adenshia lia bomb pokdaktsüba nung nisung 45 shi asü aser 100 dak tema yiru.

"Onoki tang tashi Bajaur bomb lendong bushisüngdanga osangtsüsang bendenba mapang lir. Tang tashinung iba lendong nung nokdanga aliba Daesh (ISIS) teka aliba sayur," ta police ketdangsur temi ashi.

Police temi ashiba agi, parnok takum bendanga agütsür bomb pokloktsür indang tejangja osang bendener aser lendong atalokba tesem nungi bomb disposal squad team kati kuli bendener.

Temolung melemi alir nisung asem pua lir, ta District Police

Officer Nazir Khan-i ashi.

Provincial police chief Akhtar Hayat Khan-i ashiba agi, iba lendong nung suicide bomber kati tapoktsü oset seret ter amshia liasü. Iba mungdang nung tejaklen mena alirtem rongnung bomb pokdaktsüsang dena liasü, ta pai ashi.

Yangji aliba police temi ashiba agi, bomb ya iba mungdang indang sapang anasa pokdaktsü. JUI-F District Amir Maulana Abdul Rasheed sapang tongli bomb ya apok, ta police aser tenük kuli akartemi ashi.

Asürtem rongnung JUI-F Tehsil Khar Maulana Ziaullah Jan, Navagai Tehsil General Secretary Maulana Hameedullah, District Information Secretary Mujahid Khan aser party worker ter dak tema lir. Khyber Pakhtunkhwa caretaker health minister Riaz Anwar-i Deobar aonung ashiba agi, iba lendong nung nisung 44 takum sama aser 100 dak tema yiru.

Bajaur mozüki aser anasa aliba tesem nung emergency sangdongogo, kong yirur alirtem timba anir oa lir. Kanga sashia yirur alirtem Bajaur nungi

provincial capital Peshawar nung aliba mozüki temi military helicopters amshia anir ao. Bajaur District Headquarters Hospital-i yirur aliba nisung 150 dak tema anir aru, ta Bajaur District Health Officer Dr Faisal Kamal-i ashi.

Nisung 35 shi Timargarh hospital-i yok aser kangasa mejungi yirur alir par 15 Peshawar-i Pakistan Army indang helicopter nung yok, ta pai ashi. Nisung 15 kangasa mejungi yirur lir, anungji asürtem tali akumtsü akok, ta ketdangsur temi ashi.

Ato Kilonser Shehbaz Sharif-i iba lendong khukhua aitsü aser lendong agütsür jangjateta merenshitsu nangzü. "Pakistan linük, özüng amshirtem aser asenok kumzüka ayurtemi iba ama tasü mait mapa nem takok mongudaktsütsü," ta pai tweet asü.

Sharif-i JUI-F tekolakba Maulana Fazlur Rehman den jembia liasü. Nenok mang ayimba nung onoka kasa shilem agir. Mapa tamajung inyaker shidak merenshitsu aser linük ajunga dang nangzüka ama kiralongra tatem kümdaktsütsü,

ta pai ashi.

Pai bushisüngdangtsü totuyuba agütsü aser kangasa sashia yirur alirtem danga mozü kidangi helicopter amshia anir aotsü ashi.

Pakistan Tir Arif Alvi-ia asürtem teti tatem maka tesunep nung anisüngzükjang ta sarasademtsü aser mangyimer kibong den asükhü lemsatapa liasü. Paisa yirur alirtem tekeratiba nung taneptsü angutsü imlaba lemsatop aser mapang shidak nung medical teyari agütsütsüla, ta ashi.

Deobarnü Khyber Pakhtunkhwa caretaker Chief Minister Azam Khan-i sangdong ka nung police dang nungi iba lendong indang osang tejangja meshia liasü. Pai Peshawar nung Combined Military Hospital semdanga yirur alirtem ajurua liasü.

JUI-F tekolakbai iba lendong asoshi tejashi lemsatopba party indang media cell ajanga sangdong ka nung ashi. Ato Kilonser Sharif aser Khyber Pakhtunkhwa sorkari bushisüngdang asütsüla, ta pai ashi. Allah-i linük asoshi asürtem temaba jenjangi aniketang aser yirur alirtem tekeraba nung

taneptsü agüjangma, ta Fazl-isa ashi.

Pai JUI-F workers tem dang mozü kidangi oa azü agütsütsü ayongzüka liasü. Interior Minister Rana Sanaullah-ia tweet ka nung iba lendong agütsür nem tapet temerenshi agütsütsü, ta shia liasü.

Taoba ato kilonser Imran Khan-ia asükhü lemsatapa liasü.

Pakistan aser talisa Khyber Pakhtunkhwa nung kiralongra mapa tali akumba ajanga asenok inyakyim asadangshitsu nüngdaker, aser ketdangsur temi kiralongra samatsüba nung rangloktüsüla, ta pai ashi.

Afghanistan nung Taliban sorkar indang odongtar Zabihullah Mujahid-ia iba lendong ya aija liasü.

2021 kum August ita Afghanistan yimsüsüba mendeni Taliban tanaben shilangba sülen Pakistan nung kiralongra lendong tali ajurur. January 30 nikongdang Peshawar nung aliba mosque ka nung sarasademba mapang Pakistan Taliban suicide bomber ka pasasa poksetba mapang nisung 101 asü aser 200 dak tema yirua liasü.

Women's World Cup: Japan aser Zambia nati asaya akok



Chiteni/July 31, 2023 (Agencies): Tang asaya aliba tetsürtem World Cup nung Hombarnü Group C nung Japan team-i kanga junga asaya goal 4-0 agi Spain kokogo.

Asaya nung Japan atema Hinata Miyazawa-i kanga junga asaya-a goal ana idaktsü aser parnok Group C nung temaba jenjang nung tembanga liasü.

New Zealand yimtiba kübok Wellington Regional Stadium nung asaya ya jangrademtsüka asayaogo, kong Japan team-i tasa tajung benshia asayaba den kanga kara attack süa asayaba ajanga Spain team nem kecha maongka magütsü liasü.

Asaya nung Japan asoshi Striker Riko Ueki-i goal ka idaktsü aser asaya atemtsü mapang tatsüka dang lia substitute Momoko Tanaka-i lar team asoshi goal pezübuba idakja parnok asaya ayong ayonga koka liasü.

Japan-i iba asayamung ya 2011 küm kokogo aser 2015 küma parnok tanabuba jenjang nung tembanga liasü aser taküma parnok last 16

tongtetogo. Parnok taruba asaya Norway den asayatsü. Iba asaya mekokaka Spain-a last 16-i iogo aser parnok Switzerland den asayatsü.

Asaya tetenzüklenbo Spain-i asaya amokbanger asaya ajisüaka Japan-i minute 12buba nung mezüngbuba goal idakja liasü. Iba goal ya Hinata Miyazawa-i idakja liasü. Japan den masaya tsüngda Spain pur iba asayamung nung goal ka danga mechi liasü.

Spain-i ball kanga junga belenshiaka iba ajanga Japan nem kecha timtem magütsü aser parnok counter-attack kanga junga süa liasü aser minute 29buba nung Riko Ueki-i metsüba ball ka Irene Paredes dak ondaker Spain goalkeeper Misa Rodriguez adena ai.

Asaya mezüngbuba shilem tembangtsü lia Japan asoshi Miyazawa-i tasembuba goal idakja liasü. Asaya tanabuba shilem nung Spain team-i asendenshir asaya aser parnok mapang timba ka ball belenshia liasü, ajisüaka Japan defence medentet.

Iba sülen asaya tatemtsü lia

ano substitute Momoko Tanaka-i Japan team asoshi goal pezübuba idakja parnok asaya ayong ayonga akok.

Kasa asayamung nungsa Hombarnü Zambia-i goal 3-1 agi Costa Rica madak takok nguogo. Iba asaya akokba ya Zambia asoshi FIFA Women's World Cup nung mezüngbuba asaya akokba liasü. Ajisüaka team anaprongla ya knockout stage-ibo maitsü.

Asaya nung mezüngbuba goal ya defender Lushomo Mweemba-i minute anaser second 11buba nung idakja liasü, koba asaya nung tanga tashi nung goal takaratiba idaktsüba asütsü. Iba sülen tanabuba goal ya captain Barbra Banda-i idaktsü.

Asaya nung Costa Rica asoshi goal ka ya Melissa Herrera-i idaktsü. Costa Rica team-i iba asayamung nung asaya ka danga mekokteti tembangogo.

Maneni asaya nung Zambia asoshi tasembuba goal ya Racheal Kundananji-i mapang apuloktsü asayaba mapang idakja liasü.

Digvijay Pratap Singh Davis Cup atema India team nung züngoksemogo

Chiteni/July 31, 2023 (Agencies): All-India Tennis Association-i Hombarnü sangdong ka ajanga Davis Cup team nung Digvijay Pratap Singh züngoksemba metetdaksüogo.

India team Davis Cup World Group II nung Morocco den Lucknow nung asayatsü asoshi renemba mapang team nung testüsa Digvijay züngoksemogo.

September 16 aser 17 nü asayatsü aliba asayamung atema Sumit Nagal, Sasikumar Mukund, Yuki Bhambari, Ramkumar Ramanathan aser Rohan Bopanna nunger taoba mapang team nung züngoksematoker liasü.

Bopanna asoshi iba Davis Cup ya tatembangbuba asütsü, kechiyong linük nungi temaba jenjang nung aliba tarep asayar yagi taoba ita pa iba asayamung

sülenbo Davis Cup nung ojang dang asayatsü ta sangdongogo. Maneni team nung Rohit Rajpal non-playing captain asütsü.

AITA-i ashiba agi, asayartem ya kanga junga asadanga sülen shimgo. Asayartem ya parnok indang rankings, parnok asayatsü asoshi azünga ali mali aser tanga koma asayar aser form nung ali mali item ajak asadanger shimgo.

Federation-i ashiba agi, Saketh Myneni, Manad Dehamne, Manish Sureshkumar, Karan Singh aser Yuvan Nandal ta asayar pongu main team den training agitsü.

Taküm küm tetenzüklen World Group Play-Off nung Denmark 2-3 agi makokba sülen India team World Group II-i relegate süja liasü.

Jamshedpur FC-i Brazil nunger centre-back Elsinho alizükogo



Chiteni/July 31, 2023 (Agencies): Jamshedpur FC den küm ka atema tenanzüktepba yangluba sülen Brazil nunger asayar Elson Jose dias Junior, shiba dang Elsinho ta ajar pai, iba Indian Super League (ISL) nung adenba ya pa indang career nung jenjang tasen ka agiba asütsü ta ashiba den iba ya maongka tajung ka ama agizükba lemsatepogo.

Elsinho ya Mexico club FC Juarez nungi asayaba mapang nüngtugu aküm, kong pa asaya 136 nung shilem agia liasü aser goal-a ter tashi idakja liasü. Mexico team Celaya FC-i loan nung aoba sülen pa La Liga 2 nung Spain club Racing Ferrol-i ao aser iba club nungi asaya 25 nung asaya liasü.

Brazil nunger asayar yagi defensive midfielder ama aser central defender ama asayater aser pai Jamshedpur FC nem defence nung teyari tulu agütsütsü.

Arishi küm 32 tain shiba Überaba yimti nung lir aser pa

mapang talangba ka Brazilian football lower division nung asaya liasü. Iba sülen pa Sao Paulo nung amendaker aliba club Oeste FC nungi asayaba mapang kanga junga asaya liasü.

Oeste FC nungi kanga junga asayaba sülen pa 2016 küm FC Juarez-i ao aser iba Mexico club atema kanga dang temulunglemtsü asayar ka aküm.

"Elsinho ya centre-back aser defensive midfield asayar ka lir aser pa asojen uluba dang masü technical tsütsüa sempet tajung aketba asayar ka lir," ta Jamshedpur FC head coach, Scott Cooper-i ashi.

"Asojen uluba apira pa kanga dang takara aser pa Mexico aser Brazil nung jenjang balala nung asayaogo. Pa kanga takara aser sempet tajung keta aliba agi onoki pa kanga saklok aser set piece nung pa ya kanga dang tongtibang asayar ka lir, anungji pa team nung tongtibang asayar ka asütsü ta bilemer," ta paisa shisem.

India tetsür rugby 7s team Asian Games atema qualify süogo



Chiteni/July 31, 2023 (Agencies): India tetsür rugby 7s team taruba Asian Games atema qualify süogo, kechiyong parnok Asia nung tang jenjang tenetbuba nung lir. Iba asayamung ya Hangzhou, China nung September 23 nungi October 8 tashi asayatsü lir.

India team-i küm ishika Asian nung kanga junga asaya arudar aser parnok tawa Asia Rugby 7s Trophy, Asia Rugby U20 Championship aser Asia Rugby U18 Championship nung silver medal nguogo.

Indian Olympic Association (IOA) inyakyim nung team asayartem atema team kobasa Asian Games nung asayatsü aliba team tem rongnung top 8 nung densema lir parnok dang Asian Games nung asayatsü

atema melatsü, ta shia lir.

"India Rugby nung iba ya otsüsütsü anogo ka lir. India tsürtem Asian Games nung asayatsü atema maongka anguba ya jangrademtsü ka lir. India team tenetbuba nung lir aser parnok junga asayatsü imlar. SAI, Kolkata nung renemshi tenzükogo, kong team Hangzhou, China-i September 20 nü mao tsüngda training agitsü," ta Indian Rugby Football Union tir Rahul Bose-i ashi.

"Iba mapang team-i international exposure tour nung shilem ka ama Borneo semdangtsü. Indian Rugby ya Asia nung ajaki agizüktsüsa tashitait kümdaktsütsü asoshi linük ajungai onok nongita yarira kanga ajungtsü," ta paisa shisem.

SAI Netaji Subhas Eastern Centre, Kolkata, West Bengal nung July 29 nungi September 20 nü tashi camp agiba sülen Asian Games atema team sangdongtsü.

Camp atema asayar 40 shimogo aser parnok ya India Rugby head coach, Ludwiche Van Deventer aser assistant coach, Kiano Fourie aser Terrence Joseph nungeri camp tepeyong kanga junga asadanga atatsü.

Camp nung shilem agia aliba nüngtugu asayartem rongnung Kalyani Patil, Lachmi Oraon, Sheetal Sharma, Shweta Shahi, Jyothi Yellamma, Mama Naik, aser Chelsea Goswami nunger densema lir, shirnok Hangzhou-i aotsü aliba asayar 14 rongnung densemstü imlar.

BILEMDANGANG

"Kecha minyakeri dang aibelen mememar."